



Komunikadu Imprensa

06 Fevereiru 2019

Parlamentu Nasionál

JSMP preokupa ho deputadu balun iha Parlamentu Nasionál uza linguajen ne'ebé la étiku no apropiadu iha plenáriu Parlamentu Nasionál

JSMP preokupa ho deputadu balun iha Parlamentu Nasionál (PN) uza linguajen ne'ebé la étiku no apropiadu iha plenáriu Parlamentu Nasionál.

Durante observasaun JSMP iha 04 Fevereiru 2019, iha reuniaun Plenária Parlamentu Nasionál, JSMP observa katak deputadu balun halo intervensaun iha sesaun plenariu ho linguajen ne'ebé konsidera ladún étiku no apropiadu nomós hakilar malu iha meja Parlamentu Nasionál, halo hela apresentasaun ba relatóriu fiskalizasaun iha meja Parlamentu Nasionál.

Prátika no atitude sira hanesan ne'e la'ós foin primeiravés akontese iha Parlamentu Nasionál no JSMP dalabarak ona kestiona atitude hirak-ne'e liuhosi JSMP ninia relatóriu anuál sira, hahú kedas uza linguajen ne'ebé la apropiadu, halo movimentu tun-sa'e durante plenaria nomós diskusaun individuál entre deputadu sira, atende *video call* mezmua iha ona alarme hodi hahú ona plenaria maibé deputadu sira ignora regras no prosedimentu ne'ebé aplika iha PN, inklui oras tama sai servisu nian.

Hanesan foin lalais ne'e JSMP rejista iha PN, bainhira deputadu ne'ebé nu'udar leitór hakilar membru deputadu seluk hosi Meja Parlamentu ho linguajen ne'ebé idealmente la bele akontese iha PN hanesan uma ne'ebé distintu deputadu sira haknaar-an ba hodi representa povu. Deputada ne'e hakilar nia kolega deputadu ho liafuan "*ó lalika interope ha'u*" bainhira nia kolega deputadu ne'e fó-hanion kona-ba tempu.

Aleinde ne'e deputada ne'e mós uja linguajen seluk ne'ebé la apropiadu atu demonstra nia sentimentu ka espresaun deskontimentu ruma ba deputadu sira seluk iha plenária Parlamentu Nasionál.

Literalmente liafuan 'ó' uza hodi hasé ka bolu mámbro família, kolega ka labarik sira atu substitui ema ne'e nia-naran bolu baibain nian. Liafuan "ó" normalmente uja de'it iha komunikasaun sosiál informál sira iha sociedade ka iha fatin públiku sira hanesan merkadu/komérsiu sira ka fatin/espasu ne'ebé la'ós ho natureza formál hanesan Parlamentu Nasionál.

"Parlamentu Nasionál nu'udar Orgaun Soberanu ida no deputadu sira nu'udar representante povu, tuir loloos sira tenke hatudu qualidade liuhosi kualker intervensaun polítiku inklui utilizasaun linguajen durante sesaun plenaria iha PN nune'e bele dignifika PN hanesan órgaun

soberanu no hanesan representante povu, dehan Diretór Ezekutivu JSMP, Luis de Oliveira Sampaio.

Iha Lei Nú. 15/2009 kona-ba Rejimentu Parlamentu Nasionál regula mós kona-ba ko'alia ka uzu palavra iha reuniaun plenária. Uzu palavra ne'e autoriza hosi Prezidente Meja Parlamentu Nasionál hanesan prevee iha Artigu 63 alinea 1 Lei Nú. 15/2009 no Rejimentu ne'e bandu atu deputadu sira uza palavra hodi ofende deputadu seluk ka ko'alia liafuan ne'ebé la apropiadu ka la dun iha étika hanesan prevee iha Artigu 65 Lei Nú. 15/2009.

JSMP husu ba Meja Parlamentu Nasionál atu sosializa no introdús prosedimentu sira ne'e ba deputadu sira iha kada sesaun plenaria atu evita no prevene deputadu sira uza linguajen ne'ebé la étiku no nakonu ho karáker insulta iha PN.

Atu hetan informasaun liu tan, favór ida bele kontaktu direktamente ba:

Luis de Oliveira Sampaio
Diretór Ezekutivu JSMP
Telefone: 3323883
www.jsmp.tl